


Der Medwescher Tramiter



Det Saksesch Bliet der Medwescher Himetgemeinschaft

Nr. 17 am 9. Jahr

Bälüech zem „Mediascher Infoblatt“

Nürnberg, am Juni 2013

Gedonken af Noasaksesch

Läw Tramiter-Liäser!

Det Jahr 2013 äs jo noch relativ jang, dennich äs schiun Allerloa passiert. Esi se „mir zem Baispeal nea af ist nemi Papst! ... Wore mir daot ijentlich äkest?! Em kändt et schär gliwen, et steand jo griuß uch fätt än diër farwijen Zegdung mät diën vähr Beachstuëwen. Egal: Der Papst Benedikt, und zwor die

mät der Nummer XVI, huët sich glech um Ufong vum Jahr geträt ifach zerräckzetriëden uch ä Pension ze gohn. En wärllich imolich awer uch meadich Schrätt, die mih wä norr Respäkt uëfverlongt! Esi äst gaof et det liëzt Mol viur iwer 700 heangdert Johren. Villicht wor jo der wohr Greangd, waräm hië det Drechdeach duërgeschmässen huët, totsächlich seng hiuh Aolder uch seng ugeschloän Geseangthit, dä et äm

nemi erluwt huët seng Amt än desen allgemin stermeschen, krisegescherrelten Zegden, wä et sich gehiert eoszeffeallen. Wat ich awer schär iher gliwen äs, datt hië halt ifach niche mih Last hatt, de Sopp än dä fleßich vu Länks uch vu Riëchts änegespeokst worden äs, eos-zeliëfeln.

„Normal“ hu bäs zem Benedikt Numero XVI de Stealvertriëder Christi af (Fiurtsäitzung af der nechster Segt ...)



... esi widd fiur Europa en bleesch Gorr zer fätten Keah ...

Alle Zichnungen am Bliëd
se vum Untch Wolfgang

(... *Fiurtsätzung vun der irschten Segt*)

Ierden är Amt bäs zem - egal wä - bätteren Oinjd erdrön. Awer wat äs än der hegdijen Zegd ijentlich noch normal?! Huët em zem Baispeal Last no fengem, deerem Rängdsfliesch, kaon em nemi gaonz sächer sen of em daot dro uch totsächlich af de Scheiw bekit. Derviur kaon et durcheos sen, datt em stattedessen beallich, awer sihr zuërt Ruë-Beflisch eos der aolden Himet bekit, daot esi gead schmackt, dat em nemel

märkt u wat em ijentlich geneßlich uch verzeackt erämer koat.

Cha, cha: ... wat em mät ewenich Chemie alles esi ustealle kaon ...

Net norr datt em det RuëBeflisch net ereoskiure kaon, nemel un der Konsistenz kaon em mih ereosfaingden, wä aold dä klapprich Gorr ijentlich wor beviur se dem „Bade Ion“ äm Stall zesumme-gebrochen äs, äm dro, no em lonke Wiëch uch ville „griußen Formularen“, als gead gemiëst Keah än easer „Detschlaond-Tocana“ ze laonden. Esi widd em Hegdzedaoch vun alle Segten beschässen uch bedriujen. Hiiftsach de Kass stämmt!

No diëm mir nea um 22. Dezember äm liëzte Johr alsi, mät easer Wealt doch (noch) net eangdergegongen sen, gladd won der In oder der Aonder, wat det „mir hun et verdähnt“ ubelngt, änj noch en aonder Mihnung vertritt, messe mir Medwescher nea eabedanjt zeasähn eas Geminshuft eangder der Fahn der HG fiur de nechst Zeakonft fit ze maochen.

Wat äs biësser wä wo mir es alle ist Zegt niën, es zesummeheochen uch geminsem drif nodinken, wä daot um biësten funktioniere kânt. Eas griuß Treffen heer än Dinkelsbühl vum 14. bäs 16. Juni wer dä Geliëjenhit! E jeder kaon, cha sihl siguër, mätmaochen uch mäthealfen eas geminsem Zeakonft af richtig stabil Fess ze steallen, datt mir allen noch vill uch long äst vun är hun.

Et giht derbä nemi norr äm de Froch: Wat hun ech dervun wonn ich do än diëm „HG Club“ mätmaochen? Nä, nea giht et viur allem uch däräm: Wat kaon ech persönlich bädrön datt eas Geminshuft es esi long wä mejlich erhaolde bleewt!

Mir wealle jo allen sächer noch wegter es zem Baispeal af Treffen wä dä än Dinkelsbühl froan, äm do äm Kris vu Gleichgesännten geminsem feiren ze kennen.

Det Medwesch äm färren Siwe-berjen, wohär mir Medwescher Sakse stammen, äs nodiëm mir schär allen ewech sen, nemi daot wat et ist fiur eas wor. Kaon et jo uch nemi sen, wel än diëm Moß wä det Hä, wo mir Hegt liëwen mät de Johren ängde mih zea easem richtijen „Derhim“ wordt, huët sich daot Medwesch do äm färre Siweberjen fiur eas zer Erännerung gewaondelt und wä daot mät Erännerungen esi äs, verblasst dä halt mät der Zegd.

Wat eas Geminshuft awer trotz allem zesummehealt, äs vill mih wä norr de geminsem Erännerung, un e Medwesch daot är vill vun eas Jängeren norr noch eos Erziëlungen uch aolde Beldern kennen. Et sen de Mäntschen, dä durch är Siweberjesch-Wengländesch Mentalität uch är geminsem Medwescher Saksesch Ärw mätenaonder verbeangden sen.

All daot symbolisiert net zeliëzt uch det Wopen easer HG:

Der Tramiterturm die fiur eas Identität als Medwescher stiht; Hië stiht fiëst, gestätzt vum Daoch der Kirch (vum Gluwen) und striëwt mät aller Kraft zem Himmel (Zeakonft); De Riëw (der Weng) stiht fiur eas geseallich, frihlich Wiësen; Uch drön zeliëzt de Wurzeln fiur eas Ärw, daot mir än eas beworen.

Mir sen, alle zesummen, esi wä mer sen, alsi gleichzegdich Fundament uch Miertert easer Geminshuft, fiur dä et sich menger Mihnung no liuhnt än der HG geminsem un er soliden Zeakonft ze basteln. Derbä sen, uch mätmaochen äs alles!

Härzlichst,
Ir Günther Schuster



21.12.2012

Äm daot des Wealt widd eangdergohn

Me Geang, ech mess dir lider son un desem Daoch widd eangdergohn, - wä et de Mayas prophezoat - des Wealt, dä detmol net verzoat, datt mir et net verstaonden hun, wat mir vun är alles bekun, geborcht nor uch net geschinkt:

Äm daot äs sä nea stark gekrinkt! Statt mät är durch de Zegd ze gohn hu mir es wä de Schweng bedron!

Mer sen af är erämgeridden und woren näckest net zefridden.


Mer hun eas än e Wahn gedriwen und sen fiur näst mih stohgebliwen. Mir mossten ängde wegter striëwen, und wore net äm Staond ze liëwen.

Mer woren egtel uch verliujen und hun eas äm de Zegd bedriujen, dä ijentlich geborcht nor wor.

Mät Muëcht uch Giëld, daot äs nea klor, kaon em de Sänn der Wealt net sähn. Em kaon net sähn wä Bleamen blähn, huët nichen Zegd äm ze verstohn ...

Me Geang, ech mess dir lider son, äm daot DES Wealt widd eangdergohn.

Günther Schuster,
neddergeschriwwen noch viur dem
21.12.2012



... fiur eas HG !

Der Fastenprädijer healt af dem Sittdaoch en Prädich

Eos em Medwescher Wochenblied
(1894)

Vivat! hoch de Kiël äs drech,
Lot den Hals es drinken!
Det äs jo det Hemmelrech,
Wä mir eas et dinken!
Feert ir schiu Milenium?
Stiht det Tollesären
Än dem Evangelium?
Äs det Seangtuch feeren?
Härr! ,si loss doch Schwiëwelpeeche
Wä ze Sodom mäschene!
Loss et af des Noberzech
Imol tüchtig gäschen!
Mess em dänn, äm satt ze sen,
Wä äm „Szállás“ iëßen,
Fiur den Durscht den Weingauweng
Mät de Schäff're miëßen?
Kaon em norr ä Gaz uch Risch
Mät dem Fecher wäddele?
Heocht ihr villicht maingderhisch
Ä kartona Kedlen?
Uch der Jonas healt droa Däch
Sittdaoch än dem „Waller“!
Zuëlt fiur Kost, Quartier uch Zech
Net en Schosterthaler!
't äs wä wonn ir än der Baoch
Ängde Guld wet faingden,
Enner ech Dukate maocht
Mät Respekt vun haingden!
Cha ir Neber breocht ich jo
Glatt net ze bekriden
Hait! Ke Priusderf mät flambo
(frz. flambeau-Fackeln)
Maschkura af den Schlidden!
Und de Fratzen helle mät
Wä de Aolde brommen,
Dänn de Schräft dä sprächt jo dett:
„Lasst die Kindlein kommen.“
Säht der Daniel der Profet
Die healt eoßer Riëden
Alle Johr de Fasching mät,
Awer gaonz beschieden!
Äner Lief dertän
Daonzt e statt zur „Traube“
Säingt: „Herr Gott wie ist es schön



Hier in dieser Laube.
Niët ir etzt mät Chrästesänn
Fromm de Owendmehler?
(Abendmahle)
Nit em dä mät Gölis än?
(„Gölles“ eine Branntweinmarke)
Ir verdammt Krakehler!
De Germanen dronek Met
Breaten Iuriuskealwer
(Auerochskälber);
Aoßen ohne rin Särvet
Porzellan uch Sealwer!
Und är Fräe kärzegruëd
Hadde niche Närwen,
Wulen net gleich än e Buëd
Odder läwer stärwen!
Gengen zwor äm Negligé –
Norr ä Biërefiëlen.
Doch äm daote keangde sä
Doch sich hisch empfiëlen.
Waßten ohne Crem, Pomad
Sich de Conch ze flichten.
Daonzten wä sä wore glatt
Ohne vill Geschichten.

Äs de Wealt dänn doch verdreht
Weng widd eos de Schwengen;

Wurscht-Pariser, Schlack uch Mett
Eos de biëste Wengen;
Uch eas Wopen werd ir nea
Aondersch ämgestaolden;
Statt de Weimer wird en Krämm
Un dem Schwaonz gehalden.
Härr, si zich de stroing Gesicht
Wä tea dehst aldister,
Schlaoch, zetrift det Kothgezücht
Wä ist de Philister! –
Doch saol ech äm näst uch näst
Ken duf Iure billen?
Nä, den Prädijer än der West
(Wüste)
Weall ech nemi spillen;
Dänn der Deiwel widd Ech jo
Dennich imol hiulen –
Doch befiur ech wegter gohn,
Soad der Gnod empfiulen.

Ir wärd wässen, wat ech dräckt,
Enner wä der Aonder.
Wie wor der Fastenprädijer,
die den Saksen am Sittdaoch
de Levite geliesene huët?
Vivat bleft geseangt ir Lekd,
Alle mät enaonder.


Worschenglich wor der Autor vun dese Värse Dr. Heinrich Sigmund (1867-1937), en Änkel vum Stephan Ludwig Roth. 1895 word hië Stadtuërtz ä Medwesch. Als irscht saksesch Uërtz hat hië de sozialen uch hygienischen Verhealtnesser senger Vulksgenëussen vum medizinischen Staondpunkt eangderseack. Dr.Sigmund hat gekämpft fiur Sozialhygiene, Kängderrechtum, Vulkswiuhfuërt uch Fiursorchärchtungen. Als Mätglädd des Laondeskonsistoriums hat hië den „Evangelischen Fürsorger“ als Bäblied zea den Kirchlichen Bläddern ereosgegiën. Än sengen Schräften hat hië af de verhängnisvuël Eoswirkungen des Alkoholmässbreochs uch Tabakgenass afmärksem gemaocht. 1905 erschinn äm „Mediascher Wochenblatt“ foljän Afroff: „Volksgenosse! Gedenke des Alkoholelends, unterstütze den „Alkohol-Enthaltensvereine in Ungarn“ wenigstens durch Geldsendungen.“

Dr.Sigmund uch seng Kries gehiurten uch der Bewiëjung „Internationaler Orden der Guttempler“ un. Etzt kennt em des Organisation eangder dem Numen „IOGT International“ dä sich äsätzt für Enthaldsemket, daot hist Froahit vun Alkohol uch Drogen, wä uch fiur Bräderlichket uch Fridden (neng mol für den Friddensnobelprees fiurgeschlon).

(ägescheckt vun Brigitte Binkits)

Der Drumurlëf


Eos dem Norden bän ech zeräck,
 hat bäm Fäschen munchmol Glück,
 heng aldiest e gaonz fätt Broken
 un dem Oind vum Ongelhoken.
 Nor der Weng wor knapp bemießben,
 fehlt zeliëzt bäm geaden Iëßen.
 Uch der Pali wor schniël eos,
 baold hat em jo näst am Heos.
 Na det Bär, daot kaon em dränken,
 wedd em nor seng Prees äst sänken.
 Trotzdiëm hat em zea dem Fäschen
 äng Gedrinker af dem Däsch!
 All-Inclusive gidd et net
 bä den norwejeschen Legd.
 Därem ku mir ängden hiër,
 megde gärn det Mättelmiër,
 wo em sich den Platz markiert,
 sich mä'm Drehdeach duelliert.
 Wel ze noh de Loastähl stohn,
 hiert em wat de Neber sohn.
 Schnarcht derloinjst ener wä'n Biër,
 äs se eos de Reah um Miër.
 Dron saol em uch ständich iëßen,
 uch det Dränken net vergiëßen,



viurhiër det Buffet uëflichten,
 weal em dich derhim berichten,
 wä et sich am Eoslaond liëft,
 wonn em sich net vill bewiëcht.
 Friëßen, Soffen uch long „Chillen“,
 daot gefeallt jo wärrlich villen!

Däram hun ech näst dergejen,
 wonn dä guër am Süde blewen!

*(Urlefirmpressionen, vun enem
 Medwescher Tourist)*



Der Bläck vun der Autobahn

Vum Hans Otto Tittes

Der Honnes uch der Misch, dä woren
 emol än Detschlaond af Besäck,
 und saojen af de Autobahn
 eruëwer, und zwor vun er Bräck.

„Des Autobahn, ej Misch, säch duër,
 äs briet uch lonk schär ohnen Onjd,
 wonn em sich daot ,mol iwerliëcht,
 dro kaon em son: ‚Dett äs en Sainjd!‘“

„Wä kaost tea norr esi äst son,
 ej Honnes, säch, wä gruëd dä äs.
 `t sen nichen Leecher wä bä eas,
 diën em eoswechen än j mess!“

„Ej Misch, daot mienen ech jo net.
 Af dett Stäck, wo des Autos rennen,
 wat hat em net diës Kukurutz
 uch nooch vill Krumpir'n ubäe kennen!“

Der Buser Landsmann

Vum Schuster Dutz

En ihrsem Buser Landsmann feahr –
 Ich wiß nea nemi glatt
 Genä, wo't wor – ist mät der Bahn –
 Mer schengt ken Härrestadt.

Äm sealwen Uëfdil saöß en Härr
 Mät hisch gekemmdem Hoor,
 Die, wä et sich ereosgestaolt,
 Eos Wän gebirtich wor.

Die feng baold ease Landsmann un,
 Än e Gespreech ze zähn
 Und frocht en eangder aunderm uch,
 Wer hië gewiëst ä Wän?

„Nein“, sot eas Frängd. – Der Wäner: „Wie?
 In Wien, am Donaufluß?“

Eas Landsmann saoch en ister un:
 „Na, waren Sie in Buß?“

(ägescheackt vum Wilfried Römer)

Entescht Erwuërdung



Def än er Schoppladd loat
 de Erännerung und schroat,
 wel sä am Deankeln heocht
 uch nemest sä mih breocht.
 Af ist e Lächt se streft;
 Sä glücklich derno greeft!
 Wat se dron än de Hoingd bekit
 maocht sä noch mih bekrit.

Et wor äst vun Derteos:
 En klinzich heangrich Meos!

Günther Schuster, 2012




U Medwesch Dinken - en Abo schinken! Jeder kaon en Froad beriden!



Healft bitte alle mät, äm eas Geminschuft stark ze maachen!

Heimatgemeinschaft Mediasch e.V.



Heimatgemeinschaft Mediasch e.V.
Sankt-Gallen-Ring 198
90431 Nürnberg

BEITRITTSERKLÄRUNG

Datum:

(Alle Angaben bitte in Blockschrift eintragen)

Ich/Wir möchten die Zielsetzungen der HG Mediasch e.V. unterstützen und erklären hiermit meinen/unseren Beitritt. Ich verpflichte mich, zur Zahlung des Mitgliedsbeitrages nachzukommen.

I. Bitte ausfüllen für Einzelmitgliedschaften (Alleinstehende)

Familienname Geburtsname

Vorname geboren am:

Geburtsort

Anschrift: Straße Land

PLZ Ort Telefon (freiwillig) /

Heimatort in Siebenbürgen (wenn zutreffend)

II. Bitte ausfüllen bei Familienmitgliedschaften (Ehepaare)

Familienname Vorname

Vorname (Ehefrau) Geburtsname

Geburtsort geboren am:

Anschrift: Straße Land

PLZ

Ort Telefon (freiwillig) /

Heimatort in Siebenbürgen (wenn zutreffend)

Datum:

Unterschrift des Antragstellers

Unterschrift des Ehepartners (freiwillig)

Ermächtigung zum Einzug des Mitgliedsbeitrages durch Lastschrift an die
Heimatgemeinschaft Mediasch e.V., Sankt-Gallen-Ring 198, 90431 Nürnberg.



Hiermit ermächtige ich die HG Mediasch e.V. widerruflich, meinen Mitgliedsbeitrag, jährlich

Euro 15,- (Ehepaare) Euro 10,- (Alleinstehende)

bei Fälligkeit, zu Lasten meines Kontos

Nr. BLZ bei (Kreditanstalt) durch
Lastschrift einzuziehen.

Anschrift:

Name Vorname

Straße

Land PLZ Ort

Telefon (freiwillig) /

Datum:

Unterschrift des Antragstellers

Unterschrift des Ehepartners (freiwillig)

Bankverbindung: Sparkasse Fürstenfeldbruck Kto.: 13 04 393, BLZ 700 530 70 IBAN: DE 81 7005 3070 0001 304393
Für Spenden über 50 Euro wird eine Bestätigung ausgefertigt. (Adresse erforderlich!) SWIFT-BIC: BYLADEM1FFB



- - - bitte hier abtrennen - - - bitte hier abtrennen - - -

Ermächtigung zum Einzug des Friedhofpflegesatzes durch Lastschrift an die
Heimatgemeinschaft Mediasch e.V., Sankt-Gallen-Ring 198, 90431 Nürnberg.

Hiermit ermächtige ich die HG Mediasch e.V. widerruflich, meinen Friedhofpflegesatz, jährlich Euro 6.00, zu

Lasten meines Kontos Nr. BLZ

bei (Kreditanstalt) durch Lastschrift einzuziehen.

Anschrift:

Name Vorname

Straße

Land PLZ Ort

Telefon (freiwillig) /

Datum:

Unterschrift des Antragstellers


Unterschrift des Ehepartners (freiwillig)

Bankverbindung: Sparkasse Fürstenfeldbruck Kto.: 13 04 393, BLZ 700 530 70
Für Spenden über 50 Euro wird eine Bestätigung ausgefertigt. (**Adresse erforderlich!**)


IBAN: DE 81 7005 3070 0001 304393
SWIFT-BIC: BYLADEM1FFB



Det wätzich Äk



Der Hans uch det Helga sen än Zoo kun und säh sich vill Gedärer un.
Bä de Schwengen säh se long duër, dä winzeln sich alle än der Muër.
Det Helga frocht den Hans mät spätzer Zeang:
„Sen daot deng Uverwaondten me Geang!?“
Der Hans lechelt und sot: „Nor niche Negd, dä zwië do äm Porrel se meng Schwijerlegd.“



Zwien Geange gohn af der Gass longwelt eräm. Plötzlich bäckt sich ener und hiëwt en Portemonnaie af. Segt ännen, alles Giëldscheng. Der aonder segt iwer seng Schulter und sot: „Wau, en Hufe Giëld!“ Genner bläddert de Giëldscheng ist durch und schmeißt alles mätsammt dem Portemonnaie ewech. Der aonder sot erfahrt: „Bäst tea muttich, do wor vill Giëld dertän.“ Sot genner: „Alles Faolschgiëld!“ „Wäsi Faolschgiëld!?“ „ Na, huëst tea schiun en Foafzijer mät zwo Nullen gesähn!“

Et begene sich zwien Pensionisten af der Gass. Frecht der in: „Na meng Frängd, wat arbetst tea hegd?“ „Näst“, sot der aonder. „Na daot huëst tea jo schiu Giëstern gemaocht.“ „Cha, awer Giëstern bän ich net färtich worden.“

(Ägescheackt vum Dieter Heitz)



„...fiur en Ujebläck.....“

Maon: Cha. Ändlich. Huët daot awer nea long gedeort!

Frä: Weallt tea mich verlossen?

Maon: NÄ! Wä kaost tea iwerhifft un esi äst dinken!?

Frä: Huëst tea mich gärn?

Maon: Natürlich! Vun Daoch ze Daoch änj mih!

Frä: Huëst tea mich äkest bedriujen?

Maon: NÄ! Waräm frôchst tea iwerhifft!?

Frä: Wirscht tea mich matzen?

Maon: Bä e jeder Geliëjenhit dä ich bekun!

Frä: Wirst tea mich schlon?

Maon: Bäst te verraft? Ech bä jo net esi ener!

Frä: Kaon ech dir vertran?

Maon: Cha.

Frä: Me Geläwter!



Und nea ir gead Legd: Alles noch ist eangdenhär affenzea liësen!

(Ägescheackt vum Dieter Heitz)

„Na, wä lift deng Ih?“ – „Prima. Detirscht hun ech geriëd und meng Frä hiurt zea. Dro hatt nor noch sä geriëd und ech hiurt zea. Awer noaerdängs riëde mer äng glechzegdich.“ „Und wie hirt etzt zea?“ – „De Neber“.

Wä der jang froingdert Medwescher Hans Leherer, der Schwojer vum Schuster Dutz, die seng Säster Tini zer Frä hatt, e griuß Zecher, Sänger uch Spaßviujel, emol irscht än den frühe Morjesteangden hime kaom, maocht seng Schwijermotter, dä det Afspärren des Diures mätbekun hatt, är Fenster af und ruff em uëwen af de Stroß: „Me Gott, Hans, kist te ändlich himen? Ich hun de gaonz Nuëcht näst geschlofen“. Af daot hië är dro wengselich affe leechelt: „ Na dinkste villicht ech?“ (Eos dem Bäjeltchen: Humor äm Shäpp / Des Kantors 11. Gebot, vum Erich Phleps)

(Ägescheackt vum Wilfried Römer)



E puër Maon heochen än der Sauna. Af emol klingeit en „Handy“ und e Maon giht drun: „Hallo Schatzken, hä äs en Närzmonkel än desem Geschiëft wo ich gladd bän, äm en fengen Prees, saol ich en kiefen?“ Der Maon iwerliëcht kurz: „Cha klor, kaost tea gärre maochen!“

„Oh, hieschen Donk me Schatz! Wiest te wat, af dem Wiëch hiër hun ich uch det noa Mercedes Coupé gesähn fiur norr 80.000 Euro. Ech weall dech jo net eosnätzen, awer wat minst tea, saol ich et kiefen?“ „Joi, klor, wonn et esi äs kief et!“ „Me Schatz, tea bäst der Biëst! Ech bedonke mich. Kaost tea dech noch un dä Villa än der Schullerah erännern, mät Pool uch Tennisplatz? Dä äs nea ze verkiefen fiur norr 300.000 Euro, e richtich gead Geschiëft!“ Na gead, dro kief uch noch de Villa!“ „Tea bäst ifach der Allerbiëst meng Schätz. Hegd äs der hescht Daoch ä mengem Liëwen! Ech hun dich esi gären!“

Der Maon liëcht af und frocht lachend ämränk: „Wiëm äs ijentlich det „Händy?“

(Ägescheackt vum Martin Lienerth)





... norr noch
enen kurzen
Wätz ...



*En Katz juécht en Meos. De Meos lieft än en Keahstall und sot der Keah:
„Kaost tea bitte en däckn Keahfladden af mech fluddern, datt mich de Katz
net faingd?!“ De Keah dit der Meos de Gefallen. Awer der Schwaonz vun
der Meos bleewt derteos und de Katz kaon de Meos feen.
Und de Moral vun der Geschicht!? Net allen dä dech eos dem Dräick ereos
zäh sen deng Frängd und net alle dä dech bescheißen sen deng Foand!*

(Ägescheackt vum Martin Lienerth)



Det Hippopotamus

En Geberch eos Fätt uch Fliesch,
en Gedäer daot guër net hiesch
än em dräiwe Wasser loat
uch sich sengen Toppert float.
Mät dem Schwinzken hat et gladd,
well et gläcklich wor uch satt,
fräsch markiert seng klinzich Äk
mät em Tuppes wuërmem Dräk.
Well et vun Natur eos fell,
reßt et af seng Riesemell,
giepst und grunzt äm Porr'l eräm
mät er forchtber defer Stämm.
Äm Gedroing uch äm Gestiuß,
wo der Dewel äs schniël lius,
do fählt ät sich gaonz Derhim,
dänn et äs net gärn ellin.
Kurz gesot, det fell Gedäer
wer et Mäntsch, siff et uch Bäer,
äs en Hippo, als Ruëß,
daot erkennt em un der Nuës,
wonn em net de richtich Breall,
viur de Ujen säitze weall.

Günther Schuster, 2012

IMPRESSUM:

Der **MEDWESCHER TRAMITER** versteht sich als e Bliëd zer Verbridung vu Froad uch Spaß än easer sakschen Mottersproch!

Ereosbroinjer: Himetgemeinschaft Medwesch e.V.; **Der irscht Chef:** Schuster Günther, Nürnberg

De Steallvertriëder: Gökeler Alfred (Freddy), Balingen, Buresch Horst (Mick), München

Redaktionskollegium: Mediascher Infoblatt / Medwescher Tramiter / Homepage: WWW.MEDIASCH.DE

Dr. Drotloff Hansotto, Alzenau, Fillinger Ingrid, Nürnberg, Lehrer Wolfgang, Tutzing, Römer Wilfried, Augsburg,

Schuster Günther, Nürnberg (veraontfertlich), Untch Wolfgang, Talheim; **Layout & mih:** Schuster Günther, Sankt-Gallen-Ring 198, D-90431 Nürnberg, e-Mail: hg-mediasch@kabelmail.de, **Mätarbeder Logistik ä Medwesch:** Pfr. Gerhard Servatius-Depner, Famili Ungar.

Erschengd än: Närrembrich (Nürnberg); **Wä oft?:** iest odder zwiëmöl äm Jahr als Bälüëch zem Mediascher Infoblatt (awer nor wo geneach Legd, geneach Bädträch äschäcken);

Dreack: Alföldi Nyomda Zrt., Debrecen/Eangern

Schräftlich Bädträch bitte un de Redaktion schäcken. Numentlich oder mät em Signum gezichent Bädträch steallen de Minung der Verfasser duër und messen net mät diër des Ereosbroinjers iwerinstämmen.

Det Bliëd äs ämsonst, awer mer wedden es froan wo sä eas mehrnor ewenich eangderstätzen, et mess net eabedainjd Giëld sen, awer vill Bädträch. Of des nea sealwest geschriwe sen oder irect feangden, äs allesint.

Bankverbaindung:

Sparkasse Fürstenfeldbruck, Konto: 13 04 393, BLZ: 700 530 70,
IBAN: DE81 7005 3070 0001 3043 93, SWIFT-BIC: BYLADEM 1FFB

